

SESIÓN ORDINARIA CELEBRADA POLO PLENO DO CONCELLO O DÍA

27 – XANEIRO – 2005

ORDE DO DIA

- 1.- APROBACIÓN DAS ACTAS DAS SESIÓNS ANTERIORES.
- 2.- APROBACIÓN MÉRITOS ESPECÍFICOS DO POSTO DE TRABALLO DE SECRETARIO/A XERAL DO CONCELLO DE REDONDELA.
- 3.- CREACIÓN CONSELLO PARROQUIAL DE O VISO.

ACTIVIDADE DE CONTROL DO PLENO:

- 4.- DAR CONTA DE RESOLUCIÓNS DA ALCALDÍA E CONCELLEIROS DELEGADOS.

5.- MOCIÓNS:

- 5.1.- MOCIÓN DO GRUPO MUNICIPAL DO B.N.G., PARA DINAMIZAR E DEMANDAR A PARTICIPACIÓN DAS FORZAS POLITICAS E DA SOCIEDADE GALEGA NA REDACCIÓN DUN NOVO ESTATUTO PARA GALICIA.
- 5.2.- MOCIÓN DO GRUPO MUNICIPAL DO B.N.G. PARA PROMOVER UNHA RESPONSA SOLIDARIA COA ZONA ASIÁTICA ARRASADA POLO TSUNAMI.
- 5.3.- MOCIÓN DO GRUPO MUNICIPAL DO PP PARA DEMANDAR A MELLORA DE INFRAESTRUTURAS NO MEDIO RURAL.
- 5.4.- MOCIÓN DO GRUPO MUNICIPAL DO PARTIDO POPULAR, SOBRE INTEGRACIÓN NO ORGANISMO AUTÓNOMO PROVINCIAL DE XESTIÓN DE RECURSOS LOCAIS (ORAL).

ROGOS E PREGUNTAS

Na Casa do Concello de Redondela, sendo as vinte horas do día vinteseite de xaneiro de dous mil cinco, baixo a Presidencia do Sr. Alcalde-Presidente D. XAIME REI BARREIRO, e a asistencia dos/as Sres. Concelleiros/as: D. EDUARDO JOSÉ REGUERA OCAMPO, D. EMILIO GONZÁLEZ IGLESIAS, DONA. LAURA LAGO ALLER, DONA. MÓNICA CARREIRA COUÑAGO, DONA. CARMEN RODRÍGUEZ CUNHA, D. CARLOS GONZÁLEZ FERNÁNDEZ, D. MANUEL IGLESIAS CARRERA, DONA. FRANCISCA CANAL GÓMEZ, D. JUAN TIZÓN CABALEIRO, D. FERMÍN ALFAYA PAZ, D. ANTÓN DÍAZ MOURELLE, DONA. MARIA DEL CARMEN AMOEDO DASILVA, D. JAIME DARRIBA VILAS, D. XOSÉ CARLOS PAZOS DOCAMPO, DONA. CECILIA PÉREZ ORXE, DONA. PURIFICACIÓN SERRANO CAVIEDES, D. ALEJANDRO BASTOS FERNÁNDEZ e DONA. HERMINIA QUELLE FERNÁNDEZ, tamén asistiu o Sr. Interventor do Concello D. MODESTO SOLLA SANZ, actuando como Secretaria a Secretaria da Corporación DONA. ANA ISABEL DEL CERRO DEL RIO, constituíuse o Pleno do Concello, en sesión ordinaria, conforme á convocatoria e de acordo coa Orde do Día.

Non asiste, excusando a súa ausencia, os Sres. Concelleiros D. RODÓLFO PATO GARCIA e D. MANUEL PÉREZ PARDO.

Serie A N.º 1177807

A Presidencia declara aberta a sesión, en primeira convocatoria, procedéndose a trata-los puntos da Orde do Día.-

1.- APROBACIÓN DAS ACTAS DAS SESIÓNS ANTERIORES.-

Non formulándose observacións, o Pleno do Concello, en votación ordinaria e por unanimidade dos seus membros presentes, sendo dezanove votos a favor (8 do PSdeG-PSOE, 6 do PP, 3 do B.N.G e 2 de RA), acorda prestar aprobación ás actas das sesións celebradas con carácter ordinario o día 25 de novembro de 2004, e con carácter extraordinario as dúas celebradas o 20 de decembro de 2004.-

2.- APROBACIÓN MÉRITOS ESPECÍFICOS DO POSTO DE TRABALLO DE SECRETARIO/A XERAL DO CONCELLO DE REDONDELA.-

ANTECEDENTES.-

Dictame da Comisión Informativa de Interior de data 26 de xaneiro de 2005, que transcrito dí:

"Antecedentes.-

Proposta da Alcaldía-Presidencia de data 18 de xaneiro de 2005, que transcrita dí:

"De conformidade co artigo 12 do Real Decreto 1732/1994, de 29 de xullo, a provisión de postos de traballo vacantes reservados a funcionarios con habilitación de carácter nacional efectuarase mediante concursos ordinarios de méritos convocados polos Presidentes das Corporación Locais.

Por outra banda, o artigo 99 da Lei 7/85, de 2 de abril, establece que corresponde á Administración Xeral do Estado determinar os méritos xerais, ás Comunidades Autónomas os de determinación autonómica e ás Corporacións Locais a determinación dos méritos específicos.

Vista a nova redacción dada ó artigo 17.1 do Real Decreto 1732/1994, de 29 de xullo, polo Real Decreto 834/2003, de 27 de xuño, no que se indica que "os méritos específicos formarán parte integrantes da relación de postos de traballo da entidade local correspondente", e o informe emitido o 29 de xaneiro de 2004 pola Dirección Xeral para a Administración Local do Ministerio das Administracións Públicas no sentido de "considerar admisible que con carácter provisional, hasta que se apruebe la relación de puestos correspondiente, que las Corporaciones Locales carecían de ellas, puedan aprobar los méritos específicos mediante acuerdo del Pleno",

PROPOÑO ó Pleno da Corporación a aprobación dos méritos específicos que se transcriben a continuación:

MÉRITOS ESPECÍFICOS DO POSTO DE TRABALLO DE SECRETARIO/A XERAL DO CONCELLO DE REDONDELA

1. COÑECEMENTO DO IDIOMA GALEGO

O coñecemento do idioma galego valorarase ata un máximo de 1,5 puntos, de conformidade coa seguinte escala:

- a) curso de iniciación: 0,25 puntos.
- b) curso de perfeccionamento: 0,5 puntos.
- c) Curso de especialización da linguaxe administrativa para o personal das corporacións locais: 1,5 puntos.

2. CURSOS DE FORMACIÓN E PERFECCIONAMENTO

- 2.1. Valoraranse ata un máximo de 1,5 puntos os cursos de formación e perfeccionamento de carácter xeral ou sectorial que, tendo por obxecto a formación nalguna das funcións propias do posto de traballo, non teñan relación directa coas peculiaridades e características da Corporación.

A valoración de cada curso efectuarase en función da súa duración, de conformidade coa seguinte escala:

- a) De 25 a 49 horas: 0,25 puntos.
- b) De 50 a 74 horas: 0,50 puntos
- c) De 75 a 99 horas: 0,75 puntos
- d) De 100 ou máis horas: 1 punto

- 2.2 Valoraranse ata un máximo de 2,5 puntos os cursos de formación e perfeccionamento de carácter sectorial en materia urbanística.

A valoración de cada curso efectuarase en función da súa duración de conformidade coa seguinte escala:

- a) De 25 a 49 horas: 0,50 puntos.
- b) De 50 a 74 horas: 0,75 puntos.
- c) De 75 a 99 horas: 1,00 puntos.
- d) De 100 ou máis horas: 1,25 puntos.

3. TITULACIÓNS ACADÉMICAS

Valorarase ata un máximo de 2 puntos estar en posesión do título de doutor en Dereito, Ciencias Políticas, Socioloxía, Económicas ou Empresariais, outorgándose 1 punto por cada doutorado.

PUNTUACIÓN TOTAL: 7,50 PUNTOS

Votación e dictame.-

A Comisión Informativa de Interior, en votación ordinaria e por unanimidade dos/as Sres./as Concelleiros/as asistentes, sendo 10 votos a favor (4 do Grupo Municipal do PSdeG-PSOE, 3 do PP, 2 do B.N.G., e 1 de R.A.), acordou dictaminar favorablemente a Proposta da Alcaldía transcrita, e propoñer ó Concello Pleno a súa aprobación.

VOTACIÓN E ACORDO.-

Sometido o asunto a votación, o Concello Pleno acorda por unanimidade dos seus membros presentes, sendo dezanove votos a favor (8 do PSdeG-PSOE, 6 do PP, 3 do BNG e 2 de RA), aprobar o dictame da Comisión Informativa de Interior de data 26 de xaneiro de 2005, anteriormente transcrito.-

3.- CREACIÓN CONSELLO PARROQUIAL DE O VISO.-

ANTECEDENTES.-

Dictame da Comisión Informativa de Ensino e Participación Cidadá de data 19 de xaneiro de 2005, que transcrito dí:

“A Concelleira de Participación Cidadá, Cecilia Pérez Orge, intervéñ para dicir que despois de ter varias xuntanzas cos colectivos da parroquia de O Viso, chegouse a un acordo de creación do Consello. Este podería servir de unificador da parroquia xa que hai catro asociacións veciñais e cada unha delas tira polo seu barrio, pero non pola parroquia como tal.

A continuación a concelleira propón que se vote a proposta de creación do consello parroquial de O

Serie A N.º 1177808

Viso que se axusta ao establecido no regulamento dos consellos:

“O Concello de Redondela, co obxecto de facilitar a participación dos/as veciños/as na vida política, social, económica e cultural do Concello, aprobou con data 30.05.1994 o Regulamento Municipal de Participación Veciñal, BOP de data 7 de outubro de 1994.

No capítulo 2 do Título II do regulamento citado no parágrafo anterior contémlase a creación dos órganos de participación veciñal; os consellos sectoriais e os consellos parroquiais.

Con data 10.05.2000, o Concello Pleno aproba definitivamente o Regulamento dos consellos parroquiais, BOP de data 12 de xuño de 2000, que no seu artigo 8 dí:

“Integran o Pleno do Consello Parroquial:

a.- O/a Presidente/a.

b.- Un/ha representante de cada grupo político con representación na Corporación Municipal, non precisando ter a condición de concelleiro/a.

c).- Os/as representantes das entidades actuantes na parroquia, segundo estableza o acordo plenario de creación do Consello Parroquial, en número non inferior ao do apartado b, nin superior ao triplo”.

De acordo coa instancia presentada en data 10.01.2005, na que representantes dos colectivos da parroquia solicitan a creación do Consello Parroquial de O Viso, repartidos do seguinte xeito:

Asociación de Veciños	4 representantes.
Comunidades de Montes	2 representantes.
Comunidades de Augas	2 representantes.
Asociacións Culturais	2 representantes.
Asociacións Deportivas	1 representante.

Asemade de que estea contemplado o nomeamento de suplentes dos/as representantes.

Á vista do anteriormente exposto, a Concelleira de Participación Cidadá

PROPÓN:

Primeiro.- A creación do Consello Parroquial de O Viso.

Segundo.- A súa composición no referente á participación veciñal será:

- 4 representantes das asociacións de veciños.
- 2 representantes das comunidades de montes.
- 2 representantes das comunidades de augas.
- 2 representantes das asociacións culturais.
- 1 representante das asociacións deportivas.

Terceiro.- Que os representantes poidan designar suplentes no caso de imposibilidade de asistencia dalgún dos/as titulares.”

A Presidenta somete a proposta a votación e resulta aprobada por unanimidade dos/as membros presentes.”

VOTACIÓN E ACORDO.-

Sometido o asunto a votación, o Concello Pleno acorda por unanimidade dos seus membros presentes, sendo dezanove votos a favor (8 do PSdeG-PSOE, 6 do PP, 3 do B.N.G e 2 de RA), aprobar o dictame da Comisión Informativa de Ensino e Participación Cidadá de data 19 de xaneiro de 2005, anteriormente transcrito.-

ACTIVIDADE DE CONTROL DO PLENO:

4.- DAR CONTA DE RESOLUCIÓNS DA ALCALDÍA E CONCELLEIROS DELEGADOS.-

O Concello Pleno queda enterado do contido das Resolucións da Alcaldía e dos Concelleiros Delegados dende o 23 de novembro de 2004, ata o 24 de xaneiro de 2005.-

5.- MOCIÓNS.-

5.1.- MOCIÓN DO GRUPO MUNICIPAL DO B.N.G., PARA DINAMIZAR E DEMANDAR A PARTICIPACIÓN DAS FORZAS POLÍTICAS E DA SOCIEDADE GALEGA NA REDACCIÓN DUN NOVO ESTATUTO PARA GALICIA.-

ANTECEDENTES.- Moción presentada pola Grupo Municipal do B.N.G., con data 18 de xaneiro de 2005, e número de Rexistro de Entrada no Concello 401, que transcrita dí:

“O debate sobre o modelo de Estado e sobre a súa reformación está definitivamente aberto e ocupa boa parte da actualidade política e mediática. Como galegos e galegas podemos asistir como simples espectadores a ese debate, pero tamén podemos asistir como protagonistas, coas nosas propias propostas e demostrando que pode e debe haber unha vía galega para a transformación positiva, constructiva e dialogada.

De cómo se resolva este debate depende que Galiza teña ou non as ferramentas que precisamos para construír a Galiza do século XXI: a Galiza do benestar, das ideas e das oportunidades para todos e todas. E para que Galiza saia con ben deste reto é necesario institucionalizar unha nova cultura política respectuosa co pluralismo, na que todos temos moito que aportar, sen exclusións e sen prexuízos, e nese emprego os concellos galegos deben ter un gran protagonismo.

O actual marco estatutario concebiuse como un punto de partida para o desenvolvemento dinámico do autogoberno e das institucións galegas. Neste novo tempo político o BNG quere impulsar un desenvolvemento leal do marco competencial en beneficio do autogoberno, estipulando un novo marco económico baseado na autonomía fiscal e financeira, garantindo máis compromiso do Estado con Galiza e facendo posíbel máis Galiza no mundo, abrindo novos escenarios competenciais que permitan defender os nosos intereses alá onde se deciden.

Galiza non pode agardar. A historia non entende de ritmos electorais e é o momento de asumir colectivamente un plan de traballo para asegurar que Galiza teña o seu papel protagonista na historia e no futuro que nos merecemos.

En consecuencia, o grupo municipal do BNG propón ao Pleno da Corporación Municipal a adopción do seguinte acordo:

1.- Apoiar a creación no Parlamento galego dunha “Comisión do Novo Estatuto” que nos vindeiros meses, e con independencia dos ritmos electorais, se ocupe de elaborar un documento de bases consensuado. Un decálogo de intencións e compromisos que leve o optimismo e a esperanza á sociedade galega e meta ao noso país no debate estatal.

2.- Apoiar institucionalmente o compromiso colectivo dun consenso reforzado para garantir que o

Serie A N.º 1177809

Novo Estatuto sexa efectivamente de todas e todos os galegos, comprometéndonos como representantes da cidadanía galega na colaboración co novo Parlamento que xurda das eleccións, que terá a responsabilidade de consensuar o texto definitivo, para que ninguén se sinta excluído e todos nos sintamos parte.

3.- Apoiar o obxectivo de someter o Novo Estatuto, unha vez aprobado polas Cortes do Estado tal e como determina o actual estatuto, e unha consulta popular, comprometéndonos a traballar para acadar unha participación masiva nesa consulta na que a cidadanía galega se manifeste dona de si mesma.

4.- Comprometérmonos, como representantes de distintas forzas políticas, a deixar fóra de confrontación electoral o consenso para o Novo Estatuto, traballando dende hoxe nun texto de consenso, sen interferencias foráneas."

INTERVENCIÓNS.-

- O voceiro de Redondeláns Adiante considera que o motivo da moción é que o BNG faga algo ante as próximas eleccións. Galicia xa ten un estauto e agora non é o momento de debatilo.

- A voceira do PP está en contra, e considera que resulta electoralista e pouco serio tratar este asunto nun periodo tan breve, ante as próximas eleccións. Cada partido político debe incluír nos seus programas electorais as súas propostas ó respecto, cousa que o BNG non fixo.

- O voceiro do PSdeG-PSOE manifesta que no debate de investidura do Parlamento o seu partido, xa plantexou a necesidade de abrir este debate e, igualmente o fixo en ocasións posteriores, atopándose coa postura en contra do PP. Apoia a moción se se inclúe a seguinte enmenda que non desvirtua o seu fondo: "O Pleno da Corporación acorda apoiar a creación dunha Comisión Especial no Parlamento de Galicia, para o estudo da reforma do Estatuto de Autonomía de Galicia integrada por representantes dos tres grupos parlamentarios e na que poderán comparecer expertos e representantes máis significativos da sociedade galega."

- O voceiro do BNG propón que se varie o texto da enmenda para poder aceptala, no seguinte xeito:

"O Pleno da Corporación Municipal de Redondela, acorda apoiar a creación dunha Comisión Especial no Parlamento de Galicia, para a redacción dun novo Estatuto de Autonomía de Galicia, integrada por representantes dos tres grupos parlamentarios e na que poderán comparecer expertos e representantes máis significativos da sociedade galega."

De seguido, contéstalle á voceira do PP que o BNG si ten presentado bases para a reforma do Estatuto. Non se fai electoralismo porque é un debate que existe noutras Comunidades Autónomas, e tódolos anos hai eleccións: E ademáis pídesse explicitamente que o Estatuto quede fora do debate electoral.

A voceira do PP sorpréndese da postura do grupo municipal do PSOE, xa que o Sr. Touriño rexeitou públicamente hai poucos días a reforma do Estatuto.

Contéstalle ó BNG que o seu propósito é tratar de distraer o feito de estar en contra da Constitución Europea, e a favor do Plan Ibarretxe, o que significa estar en contra da Constitución española de 1978.

- O voceiro do PSdeG-PSOE sinala que no debate público e nas actas do Parlamento figura a postura do PSOE neste tema, por outra banda, o PP en Cataluña apoia a reforma do Estatuto e incluso, voces autorizadas do PP en Galicia. Considera un escándalo que o PP defenda a Constitución española, cando nin a apoiaron, nin a votaron a favor.

- O voceiro do BNG dille á concelleira Francisca Canal que déronlle mal as indicacións, porque o proceso non se pode rematar antes das eleccións, e o BNG non está empeñado en ningunha manobra de distracción, porque ten moito interese en definir as posturas respecto a Europa, pero ese non é o debate de hoxe.

VOTACIÓN E ACORDO.-

Sometido o asunto a votación, o Concello Pleno acorda por maioría absoluta do número legal dos seus membros, sendo once votos a favor (8 do PSdeG-PSOE e 3 do BNG), e oito votos en contra (6 do PP e 2 de R.A.), aprobar o texto da moción coa enmenda formulada, sendo o seu texto o que se transcribe:

1.- Apoiar a creación dunha Comisión Especial no Parlamento de Galicia, para a redacción dun novo Estatuto de Autonomía de Galicia, integrada por representantes dos tres grupos parlamentarios e na que poderán comparecer expertos e representantes mías significativos da sociedade galega.

2.- Apoiar institucionalmente o compromiso colectivo dun consenso reforzado para garantir que o Novo Estatuto sexa efectivamente de todas e todos os galegos, comprometéndonos como representantes da cidadanía galega na colaboración co novo Parlamento que xurda das eleccións, que terá a responsabilidade de consensuar o texto definitivo, para que ninguén se sinta excluído e todos nos sintamos parte.

3.- Apoiar o obxectivo de someter o Novo Estatuto, unha vez aprobado polas Cortes do Estado tal e como determina o actual estatuto, e unha consulta popular, comprometéndonos a traballar para acadar unha participación masiva nesa consulta na que a cidadanía galega se manifeste dona de si mesma.

4.- Comprometérmonos, como representantes de distintas forzas políticas, a deixar fóra de confrontación electoral o consenso para o Novo Estatuto, traballando dende hoxe nun texto de consenso, sen interferencias foráneas.-

5.2.- MOCIÓN DO GRUPO MUNICIPAL DO B.N.G. PARA PROMOVER UNHA RESPONSA SOLIDARIA COA ZONA ASIÁTICA ARRASADA POLO TSUNAMI.-

ANTECEDENTES.

O voceiro do Grupo Municipal do BNG expón o contido da Moción de data 20 de xaneiro de 2005, núm. de Rexistro de Entrada no Concello 500, que transcrita dí:

“A catástrofe que a finais de decembro de 2004 arrasou as costas de Asia levándose a vida de moitos milleiros de persoas, sobrecolleu o corazón da cidadanía galega que tivo unha resposta solidaria colaborando a nivel individual coas organizacións non gubernamentais que traballan na zona afectada.

É necesario que sexan agora as entidades locais galegas (concellos e deputacións) as que se impliquen na financiación das tarefas levadas a cabo polas ONGD ou as institucións internacionais con presenza na zona. E que esa financiación se faga ao marxe dos posibles recursos que o noso concello poida destinar para cooperación ao desenvolvemento, xa que, segundo cifras ofrecidas pola Coordinadora Galega de ONGS para o Desenvolvemento, as entidades locais galegas –concellos e deputacións- só contribúen co 0,34 % do conxunto aportado polas entidades locais do Estado español para o desenvolvemento dos pobos empobrecidos, feito que invita á reflexión colectiva e a un maior compromiso.

En consecuencia, o grupo municipal do BNG propón ao pleno a adopción do seguinte

ACORDO:

Que nos orzamentos do ano 2005 se inclúa unha partida económica –fora da prevista para colaboración ao desenvolvemento dos pobos- destinada a financiar as tarefas desenvolvidas polas ONGDS ou as institucións internacionais (ACNUR, FAO, UNICEF, OMS, PAM, ...) con presenza na zona afectada, para paliar as consecuencias do enorme desastre producido.”

INTERVENCIÓNS.-

Serie A N.º 1177810

- O voceiro de Redondeláns Adiante está a favor da moción, aínda que considera que non era necesaria.

- A concelleira do PP, María del Carmen Amoedo Dasilva, está a favor da moción, pero solicita que concreten a partida económica.

- O voceiro do PSdeG-PSOE dá conta da reunión celebrada o pasado 21 de Xaneiro polo fondo galego de cooperación e solidariedade, ó que ten asistido a concelleira María del Carmen Rodríguez Cunha, no que se plantexou que actualmente non hai problemas de intervención inmediata, e o que hai que apoiar son proxectos con continuidade ó longo do tempo. Solicita que a axuda que achegue ó Concello se canalize a través do citado fondo, que terá unha reunión en marzo ou abril.

- O voceiro do BNG contesta que o importe da partida vai en función da dispoñibilidade do Concello, dicir agora unha cantidade sería un acto de voluntarismo, que é algo propio do PP.

- Contesta a concelleira Amoedo Dasilva sinalando que o voceiro non ten por que acusar ó PP, cando a proposta é súa.

- Respóndelle o Concelleiro Pazos Docampo que é un problema de complexo do PP, que mira fantasmas onde non os hai.

VOTACIÓN E ACORDO.-

Sometido o asunto a votación, o Concello Pleno acorda por unanimidade dos concelleiros presentes, e co quórum da maioría absoluta do número legal dos seus membros, sendo dezanove votos a favor (8 do PSdeG-PSOE, 6 do PP, 3 do BNG e 2 de Redondeláns Adiante), aprobar o texto da moción transcrita.-

5.3.- MOCIÓN DO GRUPO MUNICIPAL DO PP PARA DEMANDAR A MELLORA DE INFRAESTRUTURAS NO MEDIO RURAL.-

A Voceira do PP retira a moción presentada.-

5.4.- MOCIÓN DO GRUPO MUNICIPAL DO PARTIDO POPULAR, SOBRE INTEGRACIÓN NO ORGANISMO AUTÓNOMO PROVINCIAL DE XESTIÓN DE RECURSOS LOCAIS (ORAL).-

ANTECEDENTES.-

A voceira do PP explica que esta moción xa quería incluíla no anterior Pleno, pero non puido facelo por tratarse dun pleno extraordinario. A súa intención ó presentala é a de deixar constancia da postura do PP en relación a un asunto de relevancia municipal.

Moción do Grupo Municipal do PP, de data 26 de xaneiro de 2005, número Rexistro de Entrada no Concello 673, que transcrita dí:

“O 20 de decembro de 2004 en sesión extraordinaria o Concello en Pleno aprobou a proposta do Concelleiro de Facenda de Denunciar o contrato que o Concello ten ca empresa Gestycobro para a Recadación voluntaria e executiva de tódolos tributos do noso Concello.

O Grupo Municipal do Partido Popular ten unha seria preocupación pola maneira en que se vai a levar acabo o concurso de propostas para contratar unha empresa privada que leve a cabo as xestións antes citadas, xa que a empresa que o levaba ata agora tiña un contrato complementamente ilegal. Ante esta situación

vémonos na obriga de facer a proposta de que o noso Concello se integre no Organismo Autónomo Provincial de Xestión de Recursos Locais (ORAL), para evitar calquer tipo de irregularidade xa que este organismo conta cos seguintes servizos que serán de moita utilidade para o noso Concello e para os nosos cidadanos:

- Formación e mantemento dos padróns de tributos locais.
- Emisión de liquidacións.
- Recadación voluntaria e executiva de toda clase de tributos e doutros ingresos de dereito público das Entidades Locais.
- Xestión e colaboración na Inspección dos Tributos.
- Asesoramento xurídico en materia tributaria e defensa e representación ante os Xulgados e Tribunais das entidades delegantes.
- Asesoramento económico e contable en materia tributaria ás entidades delegantes.
- A presentación de calquera outra actividade ou servizo para a mellor efectividade dos anteriores, especialmente os relativos ás funcións catastrais.

Ante o anteriormente exposto só nos queda engadir que non seríamos o primeiro Concello en integrarnos, xa que Concellos como o de Cangas, A Estrada, Lalín, Ponteareas, O Porriño, Sanxenso, Tui, Vilagarcía, etc., etc., están traballando co ORAL sen ningún tipo de problema.

Por todo isto o Grupo Municipal do Partido Popular propón que se tome o seguinte acordo pola corporación en pleno:

- Solicitar a adhesión do Concello de Redondela ó Organismo Autónomo Provincial de Xestión de Recursos Locais."

INTERVENCIONS.-

- O voceiro de Redondeláns Adiante considera que a empresa actual funciona ben, e cando saia o concurso pronunciárase, polo que neste momento vaise abster.

- O voceiro do BNG dí que, conforme ó regulamento, está moción deberíase tratar como urxente, pero dase a paradoxa de que non se trata dun tema urxente. Descoñece cal é o interese do PP en introducir ó Concello nun sistema que non ten demostrado outra efectividade que a de colocar ós fillos dos funcionarios, militantes e altos cargos do PP, e aínda por riba cobrando altos salarios; ó mellor é que hai unha cuota de participación. Por outra banda, sinala que a apoiatura legal tamén falla, porque o artigo que fundamenta a presentación de mocións é o 91.4 e non o artigo 97 do ROF.

- A voceira do PP contéstalle ó concelleiro Pazos Docampo que non debía aludir tanto os erros dos demais, cando él mesmo tanto se equivoca, como demostrou no expediente de adquisición do vehículo da Alcaldía, e ten cometido ilegalidades, como na contratación do servizo das multas. A xestión recadatoria deste Concello queda moi mal parada no informe de fiscalización do Consello de Contas, e en anteriores informes do Interventor Municipal. Dita xestión únicamente pode ser directa, e vostedes van a adxudicar a unha empresa privada, co eufemismo do asesoramento, e iso é unha ilegalidade. Polo que se refire ó prezo a pagar, sinala que ás veces ocorre que hai que pagar un pouco máis, pero mellórase moito na efectividade do servizo. Non entende porque o grupo de goberno gústanlle tanto as empresas privadas, que son caras e funcionan mal. Entre os servizos que prestaría ó ORAL, destaca o de xestión catastral, e tamén a posta a disposición dunha oficina fora do Concello, o que permitiría que a oficina que ocupa a actual empresa na Casa do Concello fora destinada ó PP, que é algo o que ten dereito, e evitaría o feito de ter que ver os expedientes e recibir ós veciños nos pasillos.

Xa por último, destaca que hai Concellos, como o de O Porriño, gobernado polo BNG, que acaba de adherirse ó ORAL, e remata pedindo apoio a súa proposta, por ser a máis seria e eficaz.

O voceiro do PSdeG-PSOE preguntalle que canto costaría o ORAL.

Serie A N.º 1177811

A voceira do PP contesta que cando o grupo de goberno diga a súa proposta, ela dirá a do ORAL.

O voceiro do PSdeG-PSOE dille, en primeiro lugar, á voceira do PP que se non lle contesta é porque descoñece cal é a resposta; en segundo lugar, que non fale de asesores nin de empresas privadas, porque o PP contratou a Ana González como asesora da Alcaldía, e o seu compañeiro sentimental era o propietario da empresa que xestionaba a piscina, e deixou de pagar 11 millóns de pesetas á Seguridade Social, do que resulta que agora o Concello debe pagar 18 millóns.

No último Pleno propúxose a fórmula da empresa colaboradora, porque o Concello adheriuse no seu día ó ORAL, e a experiencia foi nefasta. Non recadaron nada en vía executiva, e os recibos aínda seguen alí; en canto á oficina de atención ó público estaba cerca do transformador do Castro, en Vigo.

A fórmula proposta é a máis barata e eficiente. Non resulta válido o argumento da forma de xestión escollida por outros Concellos, xa que o Concello de Vigo, gobernado polo PP, nunca estivo no ORAL, e de sempre tivo o servizo contratado cunha empresa colaboradora.

Por outra banda, os argumentos nos que se fundamenta Francisca Canal demostran o seu descoñecemento total do funcionamento do Concello, pois dende hai tres anos lévase prestando o servizo do Catastro no Concello.

Xa por último, pregúntalle á voceira do PP cal foi a razón pola que non se adheriron ó ORAL cando gobernaban en Redondela, se resulta ser un sistema tan eficaz.

- O voceiro do BNG considera que Francisca Canal non defende a súa moción, despístase, e adícase a atacar ó BNG. Resulta pouco ético e demostra ser mala persoa, aludindo de novo ó tema do coche da Alcaldía que veu motivado por un erro dun funcionario, ó que despois lle vendeu o favor. Tampouco lle pode esixir ó BNG responsabilidade en relación ó contrato da xestión das multas por dúas razóns: primeiro porque non tiña competencia no tema, e segundo porque tiña informes favorables. Hai que ter capacidade de raciocinio, e vota en contra deste sinsentido.

- A voceira do PP contéstalle ó concelleiro Pazos Docampo que con toda a súa palabrería, non vai conseguir desanimala, todo o contrario. Adícase a atacar as mocións do PP, cando nin defende nin leva á práctica as súas mocións, como sucedeu coa relativa á violencia de xénero. En canto ó expediente de adquisición do coche non pode responsabilizar ós funcionarios, porque si é tan sabio como dí, ten que saber o que asina, e no contrato das multas tampouco pode defenderse co seu argumento, porque como concelleiro non pode asinar contratos. Asesórese ben e teña en conta as recomendacións do Consello de Contas. O PP vaise manter nesta Corporación porque son sete concelleiros e teñen un respaldo maioritario.

Responde o voceiro do PSOE que o respaldo maioritario o ten o PSOE, e a maioría absoluta lle corresponde ó grupo de goberno. A concelleira Canal Gómez non debería falar do Consello de Contas, porque entón vaille ensinar o que informa respecto ás Institucións gobernadas polo PP, que é moito peor que as recomendacións feitas ó Concello.

A voceira do PP tivo que retirar a anterior moción porque mentiu, e non se entera de nada. En canto ó ORAL suporía un custo de setenta millóns de pesetas anuais, e a fórmula proposta polo grupo de goberno non chega nin de lonxe a esa cifra. A voceira do PP adícase a vender a pel do oso sen gobernar, xa que ten presumido na Deputación que Redondela ía a entrar no ORAL, e xa falaba das persoas a contratar.

- Contesta a voceira do PP, por alusións, que si dixo o número de persoas foi porque asesórase e viña na proposta do ORAL, pero non o seu nome, porque iso é máis propio do PSOE.

- Responde o voceiro do PSOE que él non ten no ORAL a ningún familiar nin compañeiro de partido.

VOTACIÓN E ACORDO.-

Sometido o asunto a votación, o Concello Pleno acorda co quórum da maioría absoluta do número legal dos seus membros, sendo once votos en contra (8 do PSdeG-PSOE e 3 do BNG), dúas abstencións (2 de Redondeláns Adiante), e seis votos a favor (6 do PP), rexeitar o texto da moción transcrita.-

ROGOS E PREGUNTAS.-

- Pregunta de D^a. FRANCISCA CANAL GÓMEZ, en relación á previsión do Concello de proceder a unha modificación puntual do Plan Xeral, co fin de posibilitar a construción dun auditorio na finca de O Carballo das Cen Polas, en Reboreda.

Repóstalle o Sr. Alcalde que a modificación pódese facer, pero a falta de execución do proxecto débese á incompetencia absoluta, negligencia e abandono da Institución que xestiona o Plan Xacobeo. O mínimo que se pode pedir é que o arquitecto que redactou o proxecto coñecese a normativa, pero a realidade é que o proxecto ten eivas significativas: non ten un número de aparcadoiros suficiente, e carece de autorización de captación de augas da Consellería de Política Territorial.

Agora como se acercan as eleccións, botan as culpas ó Concello de Redondela, cando eles son os incompetentes.

Sendo as vinteunha horas e quince minutos abandonan o salón de sesións os concelleiros D. FERMIN ALFAYA PAZ e D. EMILIO GONZÁLEZ IGLESIAS.

- Rogo do Partido Popular de que se proceda a executar o proxecto do mercado de gando.

Contesta o Sr. Alcalde que a voceira do PP non ten idea do tema unha vez máis. Vaise mandar unha memoria valorada, e esperarán a resposta da Consellería.-

E, non habendo máis asuntos que tratar, pola Presidencia dase por rematada a presente sesión, sendo as vinteunha horas e vinte minutos da data fixada no encabezamento, en proba de todo o que, se estende a presente acta, que se inscribiu no Libro dende a volta do folio núm. 156 do Papel Timbrado da Comunidade Autónoma de Galicia, Serie A nº 1177806 ata a volta do folio núm. 161 do Papel Timbrado da Comunidade Autónoma de Galicia, Seria Anº 1177811, de todo o que, como Secretaria, DOU FE.-

O ALCALDE

A SECRETARIA XERAL

XAIME REI BARREIRO

ANA ISABEL DEL CERRO DEL RIO